

ТРОПАРЬ, ГЛАС 4:

Хлебы приносныя руками своими творя, / псалмопение непрестанное
усты своими / яко жертву хвалы приношаше Господеви, / со честным
Никодимом, блаженне Спиридоне, // с нимже молися Христу Богу о душах
наших.

КОНДАК, ГЛАС 3:

Да явиши разжженную твою ко Господу любовь, / чудне Спиридоне, / раз-
жегшуюся зело пещь мантиею своею заграждаеши / и да покажеши источ-
ник вод дарований Духа в тебе живуц, / одежду своюю нося воду угашаеши
пламень огненный, / тем, яко имея дерзновение ко Господу, / со блаженным
Никодимом // молися присно о нас, поющих тя.

ВЕЛИЧАНИЕ:

Ублажаем вас, / преподобнии отцы Спиридоне и Никодиме, / и чтим святую
память вашу / наставницы монахов // и собеседницы ангелов.

АКАФИСТ ПРЕПОДОБНЫМ СПИРИДОНУ И НИКОДИМУ, ПРОСФОРНИКАМ ПЕЧЕРСКИМ (ДЛЯ КЕЛЕЙНОГО ЧТЕНИЯ)

Кондак 1, глас 8, подобен: Взбранной Воеводе:

Избранную двоицу печерских просфорников, восхваляем вас с любовью,
преподобнии Спиридоне и Никодиме. Вы, от младенчества Христа Бога
всем сердцем возлюбившии, и даже до скончания жития вашего во ино-
честве Тому поработавшии, непрестанным псалмопением и святого хлеба
приготовлением просиявшии, ныне же в веселии у Престола Святыя Троицы
предстоящи, молитесь о всех усердно вас призывающих и благодарными
усты умиленно воспевающих: **Радуйтеся, Спиридоне и Никодиме, смирен-
нии просфорницы печерстии.**

Икос 1

Ангельской чистоте поревновавшии, презревше суету мира сего со всею
скоропреходящею его красотою, ангельскому образу монашескаго жи-
тельства приобщилися есте, и доброта вашего благонравия явился людем,
яко град, не могущий укрытися, верху горы стоя. Мы же, чудящеся таковому
о вас смотрению Божиему, вопием вам сицевая:
Радуйтеся, блаженнии, не ходящи на совет нечестивых;
радуйтеся, не ставшии на пути грешных.
Радуйтеся, на седалищи губителей не сидящи;

радуйтесь, не бывшии яко нечестивии, но яко праведнии.

Радуйтесь, в законе Господнем волей укрепившиися;

радуйтесь, день и ночь в законе его поучившиися.

Радуйтесь, бывшии яко древо насажденое при исходящих вод;

радуйтесь, принешии благоприятный плод во время свое.

Радуйтесь, Спиридоне и Никодиме, смиреннии просфорницы печерстии.

Кондак 2

Зряще воистину, яко дружба с миром вражда против Бога есть, довольно в мире пожившии и в возраст преклонных лет пришедшии, возгорестесь духом о подвизех иночества и приидосте в монастырь Печерский. Уведевше же благообразие и чин иноков, в нем пребывающих, возжелесте имети равную часть с ними. Егда же были прияты есте в число братии, яко наемницы часа единонадесятаго, не понесшии тяготу и вар злобы дневной, воспесте Господеву: **Аллилуия!**

Икос 2

Разумнии и премудрии в богословии иноцы узревше вы люди просты и не книжны, познаша, яко воистину исполнися на вас речение апостола: Господь, рече, буия мира сего избра, да премудрыя посрамит. Мы же узревше в простоте вашей образ души, в нейже льсти несть, вопием вам:

Радуйтесь, нищету духовную стяжавшии;

радуйтесь, облекшиися смиренномудрием, яко ризою.

Радуйтесь, путь узкий в житии вашем избравшии;

радуйтесь, нуждою Царствие Небесное восхитившии.

Радуйтесь, Бога возлюбившии и Тому усердно поработавшии;

радуйтесь, заповедем Божиим ныне нас научающии.

Радуйтесь, Евангелие в житии вашем соблюдавшии;

радуйтесь, яко светом благочестия миру явилися есте.

Радуйтесь, Спиридоне и Никодиме, смиреннии просфорницы печерстии.

Кондак 3

Силы грамоты и учения книжнаго в море житейского плавания не разуме, обаче, егда обретшее пристань надежды в монастыре Киевском, научистесь силе богодухновенных псалмов, Давидову изусть Псалтирь извыкосте. В тойжде час, радуящися познанию мудрости истинныя, воспесте Господеву: **Аллилуия!**

Икос 3

Имуще в сердцах ваших страх Божий, беспрестанно упражнястесь во псалмех и пениих и песнех духовных. Творец же всяческих исполни вас Духа премудрости и разума, Духа совета и крепости, Духа ведения и благо-

честия. Сего ради глаголем вам сицевая:

Радуйтесь, яко повседневным плачем о гресех утешение прияли есте;

радуйтесь, яко попечение о плоти не превращасте в злыя похоти.

Радуйтесь, не ясты, но благодатию сердца укреплявши;

радуйтесь, труждающиеся и обременении в жизни привременней.

Радуйтесь, вся содевавши без ропота и сомнения;

радуйтесь, бремена друг друга носивши.

Радуйтесь, пшеницу во смиреннии сердец млевши;

радуйтесь, собрании в житницу Господню, яко пшеница чистая.

Радуйтесь, Спиридоне и Никодиме, смиреннии просфорницы печерстии.

Кондак 4

Бурею помышлений благочестивых о вас вдохновляем, игумен братии, Пимен постник, провиде в тебе, Спиридоне, мужа смирена и трудолюбива, в тебе же, Никодиме, мужа непорочна и богоприятна, отда вам послушание просфорное, сам же возблагодари Христа Пастыреначальника, даровавшего обители боголюбцев сицевых, воспевая Ему: **Аллилуия!**

Икос 4

Слыша такую о себе волю игумена, приясте сие послушание, яко от Самого Господа благословение, и приступите к исполнению его со благоговением и усердием. К вещественным же трудом и невещественныя приложите — пост желанный и молитву непрестанную. Мы же, дивящиеся таким трудам вашим о Господе, почитаем вы словесы сицевыми:

Радуйтесь, кротостию землю обетованную в наследие улучивши,

радуйтесь, доброю совестью изрядно преукрашении.

Радуйтесь, яко вера Христова вселися в сердца ваша;

радуйтесь, яко вошли есте в радость Господа своего.

Радуйтесь, в братолюбии вашем, яко во свете, пребывши;

радуйтесь, отринувши господство греха ради господства благодати.

Радуйтесь, яко любовь ваша ко Господу изгна всяческий страх;

радуйтесь, яко ныне святы есте святостию Христовою.

Радуйтесь, Спиридоне и Никодиме, смиреннии просфорницы печерстии.

Кондак 5

Богу угодныя плоды послушания вашего – святой хлеб – во время святого пения во Святое и Пречистое Тело Христово прелагахуса. На такое чудо ангели, взирающе присно, недоумеют, како Бог непостижимый предает нетленную Плоть Свою в снедь людям тленным. Священницы же, приносяще сию бескровную жертву, Богови вопиют: **Аллилуия!**

Икос 5

Видяще, блажении, всегдашнее ваше хлеба приношение в непрестанном славословии Бога совершаемое, познаша братия, яко таковое смешение дела и слова приемлетя Господем яко жертва приятная и благоугодная. Мы же, восхотевше научиться от вас таковому благоразумию, воспеваем вам сице:

Радуйтесь, алчбою и жаждою правды насыщение благодатное приемшии; радуйтесь, взявшии крест свой и за Христом последовавшии.

Радуйтесь, облекшиися во всеоружие Божие противу козней диавольских; радуйтесь, благодать Святаго Духа приемшии.

Радуйтесь, сыны Божии по вере во Христа Господа;

радуйтесь, не о плотском, но о духовном помышляющи.

Радуйтесь, попечение непрестанное друг о друге имевшии;

радуйтесь, угодившии ближним во благое к назданию.

Радуйтесь, Спиридоне и Никодиме, смиреннии просфорницы печерстии.

Кондак 6

Проповедь и слово ваше не во препретельных словесех человеческия мудрости явишася людем, преподобнии, но воистину в явлении духа и силы, якоже и рече Павел апостол. Таковому наставлению вашему внимающе, Господеву приносим песнь: **Аллилуия!**

Икос 6

Возсиясте светом богопознания, егда веру вашу делами рук ваших оправдасте. Елико трудистесь, дрова рубисте, воду носисте, или тесто месисте, обаче вместе с тем уста ваша в непрестанном славословии пребываху. Прославляюще таковое ваше преславное о Христе делание, хвалим вас сице:

Радуйтесь, милости ради ваша от Господа помиловании;

радуйтесь, соделавшиися причастницы Христу.

Радуйтесь, вся творившии яко чада Света;

радуйтесь, духа Божия в себе не угасившии.

Радуйтесь, трудолюбивии делатели на жатве Господней;

радуйтесь, не имевшии между собою разделений.

Радуйтесь, преуспевшии в угождении Богу;

радуйтесь, яко радость ваша ныне совершена.

Радуйтесь, Спиридоне и Никодиме, смиреннии просфорницы печерстии.

Кондак 7

Хотя явити вас братии чудотворцев изрядных, попусти Господь, в день обычных трудов ваших, внезапно огню пещному возгоретися, яко и покрову келлии ваша велиим пламенем объяту быти. Вы же не устрашитесь,

видящее огненное запаление, обаче с упованием во всегдашнюю помощь Божию воззваша к Нему с верою: **Аллилуия!**

Икос 7

Новых прозре вас избранников Своих Господь, услышав молитву вашу. Вразуми тя, Спиридоне, мантиею твоею заградити жерло печи огнедышащая, тебе же, Никодиме, вложи в сердце связати концы власяницы твоея, к студенцу тещи вборзе и воду принести, да угасиши ею опаление огненное. Таковое чаяное вразумление от Бога прославляюще, вам вопием, преподобнии:

Радуйтесь, в чистоте сердечней Господа созерцавшии;

радуйтесь, смирение мытарево в душах ваших содержащи.

Радуйтесь, исполнившиися всею полнотою Божиею;

радуйтесь, поощряющи нас к любви и доброделанию.

Радуйтесь, сотворившии достойный плод покаяния;

радуйтесь, диаволу противуоставшии твердостью веры вашей.

Радуйтесь, в молитве постоянство имевшии;

радуйтесь, вся соделовавшии во славу Божию.

Радуйтесь, Спиридоне и Никодиме, смиреннии просфорницы печерстии.

Кондак 8

Зрак тайнозрительный во мраце дымном увидеша помощницы ваши от числа братии, вкупе собрани, яко мантия твоя, Спиридоне, еюже прегради жерло пещное, никакоже сгараше, но пламени выход заграждаше, власяница же твоя, Никодиме, воду никакоже попусти, еюже ты покров келии угасил еси легце. Видяще таковое чудесное явление и милостивное о вас смотрение Божие, со изумлением воспеша Господеви: **Аллилуия!**

Икос 8

Весь народ израильский, видя некогда столп облачный, стоявший у входа в скинию, зело дивися. Тако и братия монастырская зело дивишася, како Господь по временем посещает людей своих, являя миру святых во образ и утешение на земли живущим. Помянувше сие, возглаголем сице:

Радуйтесь, в мире друг с другом пожившии;

радуйтесь, дружелюбием преисполнени.

Радуйтесь, тяготу послушания приемшии ради Господа;

радуйтесь, Бога боящиися и царей земных чтущии.

Радуйтесь, возревновавшии о дарех духовных;

радуйтесь, непрестанно пламенеющие духом;

Радуйтесь, явившии нам образ подражания.

радуйтесь, яко ныне возлежите на брачном пире Жениха.

Радуйтесь, Спиридоне и Никодиме, смиреннии просфорницы печерстии.

Кондак 9

Всякий день и всяку ночь диавол воздвизаше лютыя козни противу вас, Отцы богоноснии. Вы же, преисполнени помышления твердаго, яко Господь бысть вам прибежище и крепкая защита, мужественно разористе поношение вражеское непрестанным пением: **Аллилуия!**

Икос 9

Ветии многовещании не возмогут изрещи ревностное служение ваше, по Бозе совершаемое. Сего ради глаголет к вам Господь: удержите глас ваш от рыдания и очи ваши от слез, яко узрите плод труда вашего. Мы же воздаем вам пение сицевое:

Радуйтесь, правды ради от мира гонимии;

радуйтесь, имевшии мир со всеми людьми.

Радуйтесь, не искавшии славы человеческия, но токмо Божия;

радуйтесь, яко кротость ваша прославися пред человеки.

Радуйтесь, в любви непрестанней друг ко другу пребывавшии;

радуйтесь, образ здраваго учения присно содержавшии.

Радуйтесь, яко в сердца ваша вселися Дух Божий;

радуйтесь, блазии соработницы Божии.

Радуйтесь, Спиридоне и Никодиме, смиреннии просфорницы печерстии.

Кондак 10

Спасти хотяще души своя, исполнивше вся повеленная вам, не превозношастесь духом, но помышляете в себе, яко раби неключими есте, яко еже должны сотворити бесте, ко благоугождению Богови сотвористе. В сем же добром исповедании преставилися есте Господеви, святии. Ныне же не в гадании зраце, во образе хлеба приношения, но лицом к Лицу зряще Истинный Хлеб жизни — Христа Жизнодавца, хвалебно воспеваете Ему: **Аллилуия!**

Икос 10

Стены Иерихонския падоша от трубнаго гласа по смотрению Божию, тако и стены искушений диавольских, преграждающия путь в Небесное Царствие, разрушахуся от гласа молитвенных воздыханий ваших, преподобнии. Сего ради прослави вас Бог в лице всех святых отцев печерских, и по смерти вашей яви миру нетленные ваша мощи, имиже ныне пребываете в пещерех Антониевых, и всем притекающим к вам с верою источаете токи благодатныя помощи ваша. Ныне же примите хвалебныя похвалы сия:

Радуйтесь, злословие от диавола претерпевшии;

радуйтесь, приемшии духа усыновления.

Радуйтесь, увещевавшии друг друга в душе кротости;

радуйтесь, яко славили есте Бога Отца единеми усты.

Радуйтесь, совлекшиися человека ветхаго;
радуйтесь, в новаго радостно облекшиися.
Радуйтесь, спасение уллучившии, призывающе имя Господа;
радуйтесь, раби истиннии Бога Вышняго.

Радуйтесь, Спиридоне и Никодиме, смиреннии просфорницы печерстии.

Кондак 11

Проповедницею нам является честная десница твоя, Спиридоне богоприятне, еуже православных чад твоих поучаеши, како персты слагати подобает во изображение креста святаго на челе, уста же расколоучителей заграждаеши, яве обличая их неправое учение о перстосложении; сим бо образом, осенив себе крестным знамением, отшел еси ко Христу, Емуже, предстоя, молися, да угасит безмерно горящую печь страстей наших, да дарует нам истинное усердие славословити Его непрестанно во псалмех и пениих духовных в сей жизни и в будущей, да сподобит нас пети Ему: **Аллилуия!**

Икос 11

Светильник ногам и стезям вашим во время земнаго странствования всегда бе Слово Божие. Сим же Словом и на небесех утвердистесь ныне в лицезрении Святыя Троицы. Молитесь же за ны, да не оскудеет елей во светильницах наших, но да и мы обрящем елей милости у Всещедрого Бога, да срящем Жениха всевожденнаго. Уповающе на помощь вашу, молимся:

Радуйтесь, соделавшиися подражательми святых печерских отцев;
радуйтесь, сохранившии единство в союзе мира.

Радуйтесь, во единем душе и в единех мыслех соединеннии;
радуйтесь, прославившии Господа в телесех и душах ваших.

Радуйтесь, воздевавшии руки чистыя без гнева и сомнения;
радуйтесь, непрестанно приносящи Богу жертвы хвалы.

Радуйтесь, очистившии сердца ваша от лукавыя совести;
радуйтесь, яко Господь преисполни вас любовию.

Радуйтесь, Спиридоне и Никодиме, смиреннии просфорницы печерстии.

Кондак 12

Благодать Божия яви нам великое приобретение — преподобных Спиридона и Никодима, просфорников славных. Воскликнем же, благодаряще всегда за вся Бога и Отца, во имя Господа нашего Иисуса Христа, воспевающе Ему победную песнь: **Аллилуия!**

Икос 12

Поюще ваше, преподобнии, от всех прославление, радуемся о спасении вашем и во имя Бога нашего немощными гласы возвысим глас хваления нашего, яко да тщанием и дерзновением вашим исполнит Господь вся прошения наша. Ведуще, яко ныне непрестанно воспеваете псалмы ко Господу, воспеваем вам сицевая:

Радуйтесь, сограждане святым и искрении Божиим;

радуйтесь, наследовавшии обетование терпением и верою.

Радуйтесь, не искавши своя си, но пользы ближняго;

радуйтесь, Царствие Небесное в себе обретшии.

Радуйтесь, зло победившии добром бесстрашно;

радуйтесь, сильнии, сносившии немощи бессильных.

Радуйтесь, подвижницы воздержнии, венец нетленный получившии;

радуйтесь и веселитесь, яко мзда ваша многа на Небесех.

Радуйтесь, Спиридоне и Никодиме, смиреннии просфорницы печерстии.

Кондак 13

О, предивнии и славнии угодницы Божиим, преподобнии и богоноснии отцы наши Спиридоне и Никодиме! Приимите от нас, почитающих вас любовью, сие малое моление, в похвалу вам приносимое. Благоприятным вашим ходатайством испросите нам у Господа Сил неблазнену житию нашему быти, без распрей и раздоров сохраняться, в единомыслии и единовении соблюдаться. Не попустите нам внезапныя смерти без покаяния прияти, но паче в исполнении Христовых заповедей до скончания жизни обретатися. Да купно с вами в Царствии Небеснем воспоем Триединому Богу: **Аллилуия!**

МОЛИТВА

О, преподобнии и богоноснии отцы наша Спиридоне и Никодиме, просфорницы печерстии! В непрестанном псалмопении и трудех просфорных на земли подвизавшесе, Богу угодили есте и ныне в сонме святых отцев печерских на небеси от Господа прославлени. Ведем вас яко скорых помощников и заступников пред престолом Святыя Троицы, велие дерзновение молиться за вас поминающих стяжавших.

Се мы, недостойнии и многогрешнии взываем к вам и просим: помозите нам, святии, бурное море жития сего безмятежно прейти и пристанище спасения неблаженно достигнути. Испросите у Великодаровитого Бога стране нашей Российстей в мире соблюдатися, людям же ея в вере православней укреплятися, неверие же и язычество вовсе искоренити. Умолите Господа Сил даровати земли нашей плодоносие безбедное, благорастворение воздушных непрестанное. Храм сей и град и всякий храм и град, веси и всякия страны и люди Своя, да избавит Господь от глада, губительства, труса, потопа, огня, меча, нашествия иноплеменных, междоусобных брани и всяких врагов видимых и невидимых и да не предаст нас погибнути со беззаконии нашими.

Молитесь же за призывающих вас усердно в болезни, в нужде, в печали, в труде, в путешествии, в узах, в скорби, озлоблении и во всяком нестроении житейском. Научите нас, преподобнии, сохранять мир друг с другом и любовь нелицемерную между собою имети. Исходатайствуйте нам время на покаяние и безленостное духовное совершенствование.

В последний же час жития нашего не оставите нас без вашей помощи и предстательства пред Господом Христом. За молитвы ваша и заступничество, да подаст нам Судия всяческих кончину мирную и не лишит нас милости Своея вкпе с вами страшный путь мытарств воздушных преити и непреткновенно вами доведенными быти до всевожденнаго Отечества нашего Небеснаго, где вкпе с вами воспети и прославити в Троице Единого Бога Отца и Сына и Святаго Духа во веки. Аминь.